

POU W KONPRANN SISTÈM IMIGRASYON PEYI **Kanada**



Peyi Kanada gen yonn nan pi bon sistèm imigrasyon sou latè e li ofri yon pakèt posiblité pou moun ki ta renmen vini nan peyi a.

Chak ane, gen plizyè milyon moun ki soti nan tout peyi sou latè e ki rantre Kanada pou vin vizite, travay oswa etidye pou yon tibout tan. Anplis de sa, chak ane nou bay plis ke twa san mil (300 000) moun rezidans pèmanan sou ribrik yonn nan twa kategori sa yo: imigrasyon ekonomik (ouvriye ak pwofesyonèl ki vin pou travay), regwoupman famiyal (moun fanmi yo voye chèche), plis rezon imanité.

Sa pa vle di peyi Kanada louvri pòt bay nenpòt moun ki mande sa. Gen yon fason pou sa fèt, kit ou se yon moun ki sou pwoteksyon tanporè (TPS) ou ki pa gen ankenn papye Ozetazini, kit ou soti nan yon rejyon nan monn la an patikilye. Pètèt ou ka panse depi w rantre Kanada wap ka rete viv la, men sa pa fasil konsa.

Pou yon moun ka rete nan peyi Kanada, li dwe pase pa plizyè gwo etap nan sistèm imigrasyon nou an.

Si yon moun rantre ilegalman nan peyi Kanada san l' pa pase nan sa nou rele yon « pwen dantre ofisyèl », Lapolis ap arete l.



Answit fòk yo verifye si demand li a an akò avèk lwa peyi Kanada ansanm ak lwa entènasyonal yo. Gen lòt verifikasyon sou sekirite ak tout istwa moun nan tou.

Pa gen ankenn garanti moun sa ap ka rete Kanada. Si nou dekouvri yon moun pa bezwen pwoteksyon peyi Kanada, nap pran mezi ki nesèsè pou nou fèl kite peyi a. Pa ekzanp, nan ti echantiyon ayisyen ki antre ilegalman o

Kanada epi ki fè yon demann azil ke otorite yo etidye, gen sèlman 8% ki jwenn satisfaksyon.

Sepandan, gen plizyè fason yon moun ka vini Kanada pou vizite, etidye, travay oswa abite legalman.

Program imigrasyon ekonomik ak famiyal

Anpil moun ki jwenn rezidans nan peyi Kanada, yo pase pa program imigrasyon ekonomik la :

- **Antre ekspres :** Pou imigran ekonomik yo, premye etap la se kreye yon kont nan Antre ekspres. Kandida yo make pwen nan klasman dapre konesans yo genyen nan kesyon lang (franse al anglè), nivo etid yo, konpetans ak eksperyans yo. Chak de semèn, nou envite moun ki gen plis pwen yo soumèt yon demand rezidans.
- **Program kandida provens yo :** Provens yo (sof Quebec) chwazi imigran yo ta swete resevwa dapre kritè yo etabli selon pwòp bezwen yo.

- **Travayè kalifye Quebec chwazi yo :** Provens Quebec chwazi pwòp travayè kalifye pa l.
- **Program viza pou fè biznis :** Biznisman ki gen lide kreye yon biznis e ki gen èd biznisman kanadyen ka jwenn rezidans pèmanan nan peyi a pou yo ka kreye pwòp biznis yo.
- **Program èd pou fanmi :** Moun ki gen eksperyans Kanada nan pran swen timoun oswa nan okipe granmoun ki gen gwo pwoblèm sante kapab fè yon demand rezidans sou ribrik sa a.

Moun ki gen rezidans pèmanan menm jan ak sitwayen kanadyen kapab itilize kategori regwoupman fanmi an pou parene manm fanmi yo epi fè yo rantre Kanada. Nan ribrik sa, men ki moun yo konsidere kòm manm fanmi : mari, madanm, konjwen, timoun, papa, manman, gran-pè, gran-mè.

Reenstalasyon refijye yo

Peyi Kanada fyè de tradisyon imanitè li a e lap kontiye akeyi refijye ki soti aletranje. Lap kontinye aplike yon sistèm azil kap edemoun ki pè pou yo pa pèskite yo, tòtire yo, oswa touye yo. Lè yo aksepte demann yon refijye, moun nan gen dwa rete Kanada an atandan yo pran yon desizyon final sou ka l' la . Men, si yo rejte demand la, moun sa a ap oblije kite peyi a oswa yap mete l deyò.

Posibilite pou yon moun viv Kanada pou yon ti tan

Anplis de rezidans pèmanan an, gen yon pakèt lòt fason pou moun vin Kanada pou yon ti tan tankou touris, travayè, ou byen etidyan.

Peyi Kanada gen yonn nan program ki pi akeyan pou etidyan etranje nan mond la. Lekòl nou yo ki de trè bòn kalite gen plis ke kat san mil (400 000) etidyan etranje aktyèlman. Laplipa etidyan etranje yo ka travay pandan yo ap etidye

nan peyi a e lè yo fin diplome yo ka rete travay jiska 3 an. Yon pakèt etidyan etranje itilize eksperyans travay ak etid yo pou yo prezante yon demand rezidans pèmanan.

Chak ane peyi Kanada akeyi yon bann travayè etranje nan pwogram pèmi pou travay yo. Menm jan ak etidyan yo, plizyè milye travayè etranje jwenn eksperyans yo bezwen pou yo prezante yon demand rezidans pèmanan nan peyi a. Men posibilite ki genyen pou yon moun travay Kanada tanporèman :

- **Program travayè etranje tanporè :** anplwayè ki pa reyisi jwenn Kanadyen oswa rezidan pèmanan pou fè jòb yap ofri yo gen dwa pou yo jwenn otorizasyon pou yo anplwaye travayè ki soti nan lòt peyi, pou fè prèske nenpòt ki travay.
- **Program mobilite entènasyonal :** Gen moun yo ka anboche san anplwayè ya pa oblije jwenn otorizasyon pou sa akòz de avantaj sa ap rapòte peyi Kanada. Pami moun sa yo, nou jwenn moun kap fè rechèch , kèk pwofesyonèl ak biznisman, kèk travayè ki gen konpetans espesyalize ke anplwayè yo tranfere Kanada ak kèk lòt moun ankò.
- **Eksperyans entènasyonal Kanada :** Jèn ki nan kèk peyi ki siyen yon antant ak peyi Kanada gen dwa pou prezante yon demand pou yo ka vini Kanada pou fè travay-vakans, yon staj ou byen pou pran yon eksperyans kòm jèn profesyonèl.

Vini Kanada kòrèkteman

Imigrasyon jwe yon ròl enpòtan nan istwa ak devlopman peyi Kanada. Avèk tout posibilite moun ki sot lòt kote yo mennen na peyi a, imigrasyon ap kontinye reprezante yon gwo moso nan devlopman sosyete a ak ekonomi an .

Pi bon fason pou yo byen akeyi yon moun Kanada, se fè yon demand nan yonn nan program imigrasyon yo. Moun ki eseye rantre Kanada ilegalman, san yo pa pase nan yon pwen dantre ki prevwa pou sa, yo pa gen ankenn garanti yap ka rete nan peyi a.

Pou plis detay, nou ka vizite sit sa : Canada.ca/asylum